

Kapiya Sën Paulus Kevu Muginsën Vu Kerisi-yi-alam Vu Timoti

¹ Sa Paulus sën Yesu Kerisi yi sinarë sa. Anutu sën ko hil yom vu yi lo luho Kerisi Yesu sën hil navo kwad in lo, yö denër bë sa gevong huk sagi.

² Lob sa kevu kapiya sënë yök vu hong Timoti sën sa nehalë hong bë sa nalug anon hong in ayom neya timu vu Kerisi lo. Hil Amad Anutu luho hil Mehöböp Kerisi Yesu degevonng semusemu vu hong los kwaj gevongin hong, gedegevonng bayom gëp revuh.

Hil Dahun Gagek Kuungsën Na

³ Wirek sa hevongin bë sena Masedonia jak, lob senër vu hong, rëk sa bë nanër gökin nah vu hong nabë: Gemedo Epesus in genanërin alam vahi saga nabë su desarömin gagek kuungsën dok na medetahu alam dok.

⁴ Log genanër vu sir nabë degevuü keriling los gagek sën denetatekin degwaj lo na, in gagek nebë sagi nevong mekwaj kwaj. Gaç su nelok vu sir bayoj neya timu vu Anutu rë.

⁵ Sa hevong horek sënë yök vu hong rak degwa timu sënë: Sa hevongin bë desepa dok bayoj niröp jak gekwaj verök jak bayoj na timu vu Yesu, lob mëm demedo los ahëj geving sir.

⁶ Yönon, in alam vahi devuu aggata niröp sënë ya, geya deneketul lok in gagek meris medenesap sir in jeggin jeggin.

⁷ Alam sënë denekuung bë detu alam horek degwa. Rëk su denerak yō hir gagek sën denevengwëng rak lo degwa ni rë, log sir dugin gagek sënë degwa ving.

⁸ Nabë hil galë Anutu yi horek niröp nabë neggëp in bë tato aggata niröp vu hil, og hil rëk ajak ni nabë ngaa nivesa.

⁹ Yönon, hil arak ni bë horek og su yam in bë nanërin alam sën nijröp rak lo rë, gak yam in bë nanërin alam sën denekeyëh horek lo, los alam sën denevong ngaa jeggin jeggin los nengaj dahis lo. Geyam in bë nanërin alam sën deneruu demij vu Anutu lo, los alam nij paya, gesir sën denevasap Anutu yi ngaa vabuung lo, gesir sën denesepa lok ngaa dob yi mu lo; geyam in bë nanërin alam sën denesis amaj los ataj medenediik lo, los alam sën denesis mehōnon vahi medenediik lo ving.

¹⁰ Geyam in bë nanërin maluh los avëh sën denevong baggëb lo los denevong paya vu maluh ngwë lo. Geyam in bë nanërin alam sën denegodek alam in bë degeko monë jak sir lo, los alam gagek tetuhin sën, galam sën denelah gagek vun lo. Yönon, horek yam in bë nanërin ngaa nebë sënë los ngaa nipaya vahi pin sën nevong paya vu gagek anon lo.

¹¹ Gagek anon sënë neggëp lok Bengö Nivesa sën Anutu vo vu sa in bë sa nanër rangah lo, log Bengö Nivesa sagi netatekin Anutu arë böp los niwëek vu hil bë semusën ala yi.

Paulus Ahë Nivesa Vu Anutu In Kwa Pesivin Yi

¹² Hil Mehöböp Kerisi Yesu vo niwëek vu sa, gekwa nevo sa bë seyoh vu bë sa gevong yi huk,

lob vong huk sënë loḵ ya sa nemag, lom sa ahëg nivesa vu yi.

¹³ Yönon, wirek og senër pelë raḵ yi, log sa nehevong begö vu yi alam rot gesa nehaḵo sa raḵ vu yi pangsen. Sa nehevong nebë saga in sa su raḵ degwa ni rë, gesa su hevong ving yi rë, rëḵ ma gekwa pesivin sa.

¹⁴ Lob Mehöböp vong semusemu ngahiseḵë rot vu sa, bemëm sayog neya timu vu Yesu Kerisi, besahëg ving yi pangsen.

¹⁵ Gagek sënëḵ yönon rot, beyoh vu bë alam pin degengo medevong geving nabë Kerisi Yesu luk yam dob in bë geḵo hil alam nid paya nom vu yi. Lob sa mehö nig paya veröḵ yi rot kesuu alam nij paya vahi pin.

¹⁶ Rëḵ mu Kerisi Yesu kwa vongin sa mugin betato rangah raḵ sa bë nejom yi ahon rot. Lob alam vahi pin sën rëḵ ayoj na timu vu yi lo degelë jaḵ sa bedejak ni nabë rëḵ kwa gevongin sir nabë saga geving, bedemedo malaj-tumsën degwata.

¹⁷ Om hil gaḵo mehö-los-bengö sën nedo degwata los degwata lo arë jaḵ. Arë böpata los niwëëḵ gëp rangah beyö gëp degwata los degwata, in mehö sënë og su nediik rë, gehil su ayoh vu bë galë yi rë, log yik yi perurek timu saga sën Anutu soḵek.

Timoti Bare Niwëëḵ Begedu Alam Sën Denesis Begö Vu Anutu Lo

¹⁸ Nalug Timoti-e! Sebo horek sënë vu hong nabë: Kwam bo gagek sën alam-denenër-gagek-rangahsën denër raḵ hong wirek lo. Gebasu gagek sagi doḵ na ayom, loḵ mëm pasang gwevong begö megebare niwëëḵ nabë mehö-begö-yi nivesa ti.

19 Lob gwevong geving niwëek megebare, gegemedo los ayom niröp. In alam vahi su denesepa loḵ ngaa nivesa in bë ayoj niröp jaḵ rë, om sën deneyoh paya medevasap sir nebë sën yaḡ ya mesis yi raḵ saap.

20 Yik Humenaius luho Aleksander devong nebë sënë, lob sa hevong luho loḵ yah Satan nema in bë luho degeḵo vanë medejaḵ ni, in luho su denanër pelësën jaḵ Anutu arë nah gökin.

2

Hil Najom Jaḵ Nabë Sënë

1 Sa bë nanër niwëek vu hong nabë ham gw-evong ngaa sënë natu muginsën: Ham najom jaḵ in alam pin. Ham kwetaḡ vu Anutu nabë doḵ vu sir bebo niwëek vu sir medebare, log ham najom jaḵ los kwamin vesa vu yi in sir.

2 Log su kwam birek in alam-los-bengöj galam pin sën denetu ala medenegin hil lo. Gaḵ genajom jaḵ in sir noh vu buk in mëm hil sepa doḵ Anutu megaḵo arë jaḵ niröp, log hil medo nivesa gengaa maggin su dahun hil.

3 Jomraksën nabë sënë og mëm yoh vu, bAnutu sën ḵo hil yom lo rëḵ kwa vesa in.

4 Neḵo hil yom vu yi, genevong in bë geḵo alam pin nom geving, bemëm dejaḵ gaḡek anon degwa ni.

5 In hil arax ni bë Anutu yö timu nedo, log Mehö mamer-yi timu nare loḵ Anutu los mehönon vuheng atov. Yik yi Kerisi Yesu, geyi mehönon.

6 Lob töḵ yam rangah loḵ yi buk niröp sën Anutu yö ggooin raḵ menër lo, bediik loḵ yah alam pin bej in bago sir nom.

⁷ Log Anutu ggooin sa raḵ bē sa natu sinarē begevong yi huk menanēr yi gāgek sēnē rangah. Sagi og sa su nehekuung raḵ rē, gaḵ sa nanēr yōnon. Geggooin sa raḵ, menevong sa ya vu alam-yu-ngwē in bē sa tateḵin gāgek vu sir bayoj na timu vu yi medejaḵ gāgek anon ni.

⁸ Nebē sēnē, om sa hevongin bē alam denajom jaḵ noh vu nyēg pin. Rēḵ mu degevuū gāgek petupeksēn los ahē sengēnsēn na gedepesu nemaj in ngaa nipaya loḵ mēm debarah nemaj jaḵ medenajom jaḵ na vu Anutu.

Gāgek Raḵ Avēh

⁹ Log sa hevongin ving bē: Avēh dedahun sir bedejöp röpröp lu ngaa nivesa sēn yik yoh vu bē avēh dejöp lo. Gaḵ su degeḵo sir jaḵ medebii yuj los debunēḵ vu navij jaḵ kumkum goor lu vuneksēn malangēri aggagga, los röpröp sēn yi monē böpata lo.

¹⁰ Gaḵ degevong huk nivesa aggagga noh vu sēn Anutu yi hur avēh lo degevong lo, og mēm sēnē natu hir vuneksēn anon rot.

¹¹ Avēh dedahun sir bayej nama gedegengo gāgek medejaḵ ni nivesa.

¹² Sa hevongin bē avēh ti su natu tatovaha ma ggev vu maluh rē, gaḵ sir avēh og avij gemir gemedo denapöö jaḵ gāgek mu.

¹³ In degwa nebē Anutu semu Adam muḡin loḵ mēm semu Eva tamusēn.

¹⁴ Lob Adam su bē nenga vu gāgek kuungsēn rē, gaḵ avēh mu yō keyēh mebē nenga vu gāgek.

¹⁵ Rēḵ mu avēh hir huk bē degeḵo naluj, om yik degevong nabē saga, gayoj na timu vu Yesu geving bahēj nivesa vu mehōnon medesepa doḵ aggata

niröp los degegin sir nivesa, og Anutu rëk geço sir nah vu yi.

3

Gagek Rağ Ggev Sën Denegin Kerisi-yi-alam Lo

¹ Gagek sënë og yönon: Bë mehöti gevongin nabë natu ggev begegin Kerisi-yi-alam, og sënëk gevong in huk nivesa ti.

² Nebë sënë, om ggev gegin yi nivesa in ngaa nipaya su gëp vu yi. Yik geço avëh timu natu venë. Su gevong ngaa jeggin jeggin, gağ yik sepa dok kwa nivesa mu megevong huk niröp pin, gegegin alam vatëvek nivesa, getatekin Anutu yi gagek nivesa megero.

³ Ggev nebë sënë og su nanum pangsen mekeyevin, log su ahë sengen jağ pevis, gağ nahubin alam gesu gevong begö jeggin jeggin, gesu gëp natumin monë pangsen.

⁴ Geyö gegin venë lo nalu lo nivesa begevong benalu lo nengaj yes vu aye medegurek babu.

⁵ In mehö sën su negin venë lo nalu lo nivesa rë lo, og su yoh vu bë rëk natu Anutu-yi-alam lo hir ggev megegin sir nivesa rë.

⁶ Log ham su ggevong bemehö mewis ti sën nahen neggerin yi yom vu Kerisi lo natu ggev. In rëk geço yi jağ jağ lob rëk bës benatök vu nyëvewen nabë Satan.

⁷ Om nabë hil getung mehöti natu ggev, og alam dahis la denaner geving rë nabë yi mehö nivesa, og mëm yoh vu bë natu ggev. Gağ nabë hil su gango rë, og mağ rëk gagek nipaya natök rangah jağ yi, lob dok Satan yi gegweeng.

Gagek Raḵ Kerisi-yi-alam Hir Hur

⁸ Log gwetung alam sën kwaj nivesa lo denatu Kerisi-yi-alam hir hur geving nabë saga. Alam sën su denevong kwaj luu rë lo, galam sën su denenum wain rot medenekeyevin rë lo, galam sën su ggëp denetumin monë luu ngaa rë lo.

⁹ Gaḵ mëm sir sën ayoj yö neggëp niröp geden-erak gagek-anon-vongvingsën-yi ni venuh lo og mëm.

¹⁰ Ham seggi sir namugin rë, loḵ nabë gagek ti su neggëp vu sir rë, og mëm denatu Kerisi-yi-alam hir hur.

¹¹ Log ham gwetung avëh sën kwaj nivesa lo geving nabë saga. Avëh sën su denenër gagek nipaya yah nenga raḵ mehö ngwë rë lo, gesu denevong ngaa jeggin jeggin rë lo, gaḵ denenër gagek niröp bedenevong yoh vu lo.

¹² Lob Kerisi-yi-alam hir hur lo, og degeḵo avëh ti ti natu venëj, lob degegin venëj los naluj nivesa.

¹³ Lob sir sën detu Kerisi-yi-alam hir hur bedenevong huk nivesa lo, og rëḵ bengöj nivesa, lob deyoh vu bë rëḵ degevong Kerisi Yesu yi huk nivesa los niwëëk.

Anutu Yi Aggata Degwa

¹⁴ Yönon, gwëbeng sa neḵevu ḵapiya sënë yöḵ vu hong, rëḵ mu sa bë nöḵ vu hong pevis.

¹⁵ Rëḵ mu nabë sa su nöḵ pevis rë, og gwelë gagek sënë megejaḵ ni nabë Anutu-yi-alam sën detu Mehöböḵ Mala-tumsën-degwa yi alam lo, og rëḵ degevong nabë sënë in denegin gagek anon medenegadu.

¹⁶ Yönon, gagek sën duu hil yah vetii Anutu lo, og gagek böpata rot bedegwa neggëp. Gagek sënë nebë:

Tu mehönon raḵ betöḵ yam rangah,

log Anon Vabuung tateḵin yi degwa bë yi mehö yohvu.

Angër delë yi,

log bengö yoh vu alam dahis.

Mehönon ayoj neya timu vu yi,

lob Anutu ḵo yi raḵ yah vavunë beḵo arë raḵ.

4

Gagek Raḵ Alam Tetuhinsën

¹ Anon Vabuung nër rangah bë dus jaḵ Buk-tamusën og alam vahi rëḵ degevu u gagek sën hil nehevong ving lo na, getum rëḵ degebë nengaj vu memö kuungsën ayej bedesepa doḵ Satan yi angër nipaya lo hir gagek.

² Ngaa sënë rëḵ nam vu alam kwaj luu sën denenër gagek kuungsën lo. Alam sënë rëḵ ayoj bev rasap nabë aën niḵerus, besu deyoh vu bë deseggi ngaa nipaya los niröp medejaḵ ni rë.

³ Log alam saga rëḵ denanërin nabë maluh los avëh su degeḵo sir, gaḵ demedo bu, log rëḵ denanërin nos los reggu vahi nabë hil su aḵa. Rëḵ mu su yoh vu rë, gaḵ Anutu yö tung ngaa pin sënë in bë hil mehönon sën hil ayod neya timu vu yi menaraḵ yi gagek anon ni lo, hil aḵa gahëd nivesa vu Anutu.

⁴ In ngaa pin sën Anutu tung lo og nivesa, om hil su ajuuk, gaḵ hil nanër ahëd nivesa vu Anutu gehil aḵa.

⁵ Eë, yönon, Anutu yi gagek los hil jomraḵsën saga nevong benivesa neraḵ.

Timoti Tu Kerisi Yi Hur Nivesa

⁶ Log nabë genanër gagek pin saga vu hil arid lo sën Kerisi-yi-alam lo, og mëm saga rëk tato nabë getu Yesu Kerisi yi hur nivesa ti gegenesepa loğ gagek niröp megenerağ gagek sën hil nehevong ving lo degwa ni.

⁷ Rëk mu nim dëlin keriing nipaya los avëh atov hir gagek turinsën meris meris, gağ mëm getahu hong doğ Anutu yi aggata nivesa.

⁸ Yönon, hil netahu hil loğ ngaa navid yi in bë hil navid gengoin, rëk mu yik nelok vu hil paya teka mu. Gağ mu nabë hil tahu hil doğ Anutu yi aggata, og yoh vu bë rëk doğ vu hil pangsën rot. Sagi og yoh vu bë doğ vu hil vu buk sën hil nado gwëbeng agi, gehil rëk medo malad-tumsën vu tamusën geving.

⁹ Gagek sënëk yönon rot, beyoh vu bë alam pin degengo medegevong geving.

¹⁰ Om sën hil nehevong huk böp los nid kerus kerus. Hil ahurek Anutu sën mala-tumsën degwa lo babu in nevongin bë geko alam pin nom vu yi, lob ko hil sën hil ayod neya timu vu yi lo yom yönon.

¹¹ Om genanër gagek sënë vu sir megetahu sir doğ in desepa doğ.

¹² Nabë alam degelë hong nabë genahën magëm, bekwaj bo nabë hong mehö meris, og su gwevu huk rë. Gağ gemedo megetato aggata vu Kerisi-yi-alam pin jağ ngaa pin sën genanër los gwevong lo. Getato vu sir nabë ahëm neving sir yönon gayom neya timu vu Yesu, gegenesepa loğ ngaa niröp mu.

¹³ Su nim tebö, gağ nim wëëk megenatevin Anutu yi gagek vu alam, begenanër Bengö Nivesa

rangah megetatekin vu sir rot bena berup doḵ buk sën senök berup vu hong lo.

¹⁴ Su nim yes yes in Anutu yi semusën sën vo vu hong lo, in alam ggev debë nemaj rak hong wirek. Log alam-denenër-gägek-rangahsën denër bë semusën sënë rëḵ natök vu hong.

¹⁵ Om gwegin huk sagi nivesa noh vu buk begemedo doḵ rot, lob mëm alam pin rëḵ degelë nabë hong huk neya nivesa.

¹⁶ Gwegin hong los huk sën genevong agi bek-wam bo gägek sën getahu sir doḵ lo nivesa. Gw-evong huk sënë niwëëk rot, og mëm rëḵ gwëḵo hong nom vu Anutu, begwëḵo alam sën degengö hong gägek lo nom geving.

5

Timoti Geli Alam Doḵ Aggata Niröp

¹ Su gebo gägek jaḵ alam böp, gaḵ gwelë sir nabë amam lo benahub gebo horek vu sir. Log gwelë alam magëm nabë arim lo sir.

² Log avëh böp og gwelë sir nabë atam lo, log gwelë avëh avö nabë avëhnöm lo gengaa nipaya nöḵ gëp.

Gägek Rak Avëh Alov

³ Log gwegin avëh alov lo sën reggaj diik gehej alam ma lo nivesa.

⁴ Gaḵ avëh alov sën nalu lo ma bu lo denedo lo, og mëm dejaḵ ni nivesa nabë hir huk neggëp bë dedoḵ vu amaj los ataj gebuj medegegin sir nivesa doḵ nah sën denegin sir wirek lo. In Anutu kwa vesa in ngaa nebë sënë.

⁵ In avèh alov sèn yö perurek timu nedo lo, og rëk ayo na timu vu Anutu rot, lob rëk bengev jak mèketağ na vu Anutu in alam buk gerangah.

⁶ Rëk mu avèh alov sèn yö kwa nevo ngaa sèn nesemu navi mu lo, og nahèn nedo vesa rëk mu tu ngaa diiksèn.

⁷ Om genanër ngaa sènë tato vu avèh geving, in desepa doğ medemedo niröp gegagek la su gëp vu sir.

⁸ Rëk mu nabë mehöti su gegin yö yi alam nivesa rë, og mehö sènë su ayo neya timu vu Yesu rë. Yönon, nabë mehöti su gegin sir sèn losho beggang ayo timu lo nivesa rë, og yi mehö nipaya verök yi rot kesuu alam dahis.

⁹ Lob nabë kwevu avèh alov arëj nabë Kerisi-yi-alam degegin sir, og kwevu sir nabë sènë arëj: Avèh sèn rağ maluh timu rëk diik genedo alov, lob yi ta mehödahis löö ya ggovek lo.

¹⁰ Gavèh sèn alam denenër bengö bë nevong ngaa pin nivesa lo, og kwevu avèh nabë sènë lo arëj. Gavèh sèn negin nalu lo nivesa, genevet alam vatëvek, geneço Kerisi-yi-alam vahi rağ genelok vu alam sèn denetök vu maggin lo, genevong huk nivesa vesa aggagga lo. Kë, avèh nabë sènë og mëm kwevu arëj.

¹¹ Gağ su kwevu avèh sèn nahèn navij mewis gereggaj nediik lo arëj, in rëk ayoj gurek in maluh, bahëj geving nabë dejak maluh ngwë gökin, lob su kwaj bo Kerisi timu rë.

¹² Lob alam rëk denanër sir nabë nij paya, in dekeyèh gagek sèn denër bë degevong huk vu Kerisi timu lo.

¹³ Rëk su rëk degevong nabë sènë mu rë. Gağ

rëk nij tebö jak pevis medegëp sehëb, gedegetup dok alam hir beggang medenengo mehö ngwë hir gagek medejak nij in mena detanë medenanër gagek aggagga sën hil su ayoh vu bë nanër rè lo.

¹⁴ Nebë sënë om sa bë avëh alov sën nahën navij mewis lo, og dejak reggaj nah in degeko naluj meyö degegin dok hir beggang. Yik degevonng nabë sënë in Mehö sën nesis begö vu hil lo su natök vu gagek nipaya ti menanër jak hil.

¹⁵ In geraç ni bë avëh la devuu aggata nivesa ya ggovek ya nebë sënë gedenesepa loç Satan.

¹⁶ Nabë Anutu yi hur avëh ti yi alam la reggaj denadiik gedemedo alov, og avëh saga yö gegin sir. Yö gevong nabë sënë in su debo maggin vu Kerisi-yi-alam vahi medegegin sir. Nabë sënë in Kerisi-yi-alam mëm yik degegin avëh alov sën hir alam main sir lo mu.

Gagek Raç Alam Ggev

¹⁷ Alam ggev sën denevonng huk nivesa rot lo, og ham sën Kerisi-yi-alam ham lo gwëko arëj jak geham dok vu sir nivesa rot. Sënëk sa nanër alam ggev sën denevonng huk niwëek medenenër Anutu yi gagek rangah medenetatekin nivesa vu alam lo.

¹⁸ Nabë saga in gagek neggëp loç Anutu-yi-kapiya nebë, “Su getaya burmakau sën denevonng huk bedenevakë wit* lo avij,” gaç gëp in yik dega teka! In gagek ngwë neggëp ving bë, “Mehö sën nevonng huk lo, og yoh vu bë geço nyëvewen jak.”

¹⁹ Log nabë mehö ti nanër ggev ti nabë nevonng paya, og su gwëbë nengam vu aye, gaç mëm nabë mehö luu ma mehö löö denanër og mëm.

²⁰ Gaḵ mēm nabē ggev ti gevong ngaa nipaya ti, og gebarah yi verōḵ jaḵ alam ggev pin malaj, in sir vahi degelē lob degōneng in sir.

²¹ Sa nanēr vu hong niwēēk jaḵ Anutu geKerisi Yesu losho angēr sēn Anutu ggooin sir raḵ lo malaj nabē: Gesepa dok gagek sēn sa kevu agi nirōp, besu kwam bo mehōti dok ayom namugin nabē vong paya, ma su vong paya rē, gaḵ gwengo gagek nivesa megeseggi loḵ mēm. Log su genanēr gagek ahē sekē vu alam vahi gegenanēr gagek ahē yes vu hong alam.

²² Log su gweḵo mehō ti megwevong natu ggev pevis rē, in yi ngaa nipaya rēḵ nom peḵa jaḵ hong geving, om ngo gwegin hong nivesa in gemedo nivesa gengaa nipaya su gēp vu hong.

²³ Log su genanum bēl kul meris mu rē, gaḵ genanum wain teka geving, in gevong bahēm medo nivesa, geniraksēn sēn netōḵ vu hong buk ngahi lo nivesa jaḵ teka.

²⁴ Log alam vahi, og hir ngaa nipaya neggēp rangah behil pin arak ni bē rēḵ denatōḵ vu nyēvewen dok nah, rēḵ mu alam vahi, og hir ngaa nipaya yō neggēp vunsēn, benahub rē loḵ mēm netōḵ yam rangah.

²⁵ Yiḵ ngaa nivesa vahi neggēp rangah nebē saga ving, gaḵ nabē neggēp vunsēn og yō rēḵ netōḵ yam rangah tamusēn in su yoh vu bē gēp vunsēn degwata rē.

6

Gagek Raḵ Hur Sēn Detu Ngaa Meris

¹ Alam pin sën mehö la denebago sir medenetu hir ngaa meris lo, nabë Kerisi-yi-alam sir og degurek alaj lo babuj in gägek nipaya su jikin Anutu arë los yi gägek sën hil nanër lo.

² Log hur sën alaj detu Kerisi-yi-alam lo, og su kwaj bo nabë arij om degevonğ huk paya paya gesu degöneng in sir rë. Gağ ahëj geving alaj sënë rot in Kerisi-yi-alam sir, gepasang degevonğ huk nivesa rot vu sir. Om gëtakekin vu alam nabë degevonğ ngaa nabë sënë, log genanër be-degevonğ.

Hil Su Ahëd Geving Monë Pangsën

³ Hil Mehöböp Yesu Kerisi yi gägek netatekin Anutu yi ngaa rangah menero vu hil niröp. Om nabë mehöti gebë gägek sënë geto getahu mehönon dok gägek agga ngwë,

⁴ og hil ajağ ni nabë mehö sënë neğo yi rağ meris mu. Su kwa teka neggëp rë, gağ kwa nipaya neggëp vu yi. In ahë neving bë luho mehö ngwë degök sir in gägek la bedekesuu sir. Log ahë neving bë demehoo sir in gägek degwa. Ngaa nebë sënë og nevonğ balam ayoj nesis yi, gedenevonğ begö, gedenenër pelësën rağ sir, gekwaj nevo ngaa nipaya rağ alam vahi.

⁵ Log denenër sir in gägek bahëj sengën yoh vu buk in kwaj nipaya, gağ gägek anon su neggëp vu sir rë, in denekuung bë hil nesepa loğ Anutu in hil agorek kupeğ lu ngaa.

⁶ Yönon, nabë mehöti sepa dok Anutu niröp begelë ngaa sën neggëp vu yi lo nabë yik yoh vu yi, og nelë saga bë neğo ngaa ngahisekë rot.

⁷ In hil atad ko hil los nemad meris vu dob, log buk sën hil gevuu dob lo, og hil rëk anah nemad meris nabë saga.

⁸ Om nabë hil nos los tob neggëp vu hil, og yik ggovek behil medo revuh los kwad vesa.

⁹ Rëk alam sën kwaj nevo bë degeko kupek ngahisekë rot lo, og seggisën rëk natök vu sir, lob rëk debës nabë sën mehōnon deneko reggu luk söv. Ayoj nekehe sir in kupek lu ngaa, lob denesepa lok ngaa kwamasën los ngaa nipaya agga ngahisekë, om rëk kebu jak sir bedenadiik bemalaj nama.

¹⁰ In ngaa nipaya aggagga degwa neggëp vu sën alam ahëj neving monë lo. Yōnon, alam vahi ahëj neving monë pangsën rot, lob nedadii sir gedenevuu vongvingsën ya, log denevasap sir rak sënë medenetök vu maggin böpata rot.

Genapiik Vu Sën Gemedo Malam-Tumsën Degwata Lo Niwëek

¹¹ Rëk mu hong sën Anutu-yi-alam hong lo, og gweruu demim vu ngaa nabë sënë gegebeya in. Gaq yik nim wëek megesepa dok ngaa niröp los Anutu yi aggata sogek. Ayom na timu vu yi, log ahëm geving alam pangsën. Genajom hong ahon megebare niwëek gemalam yes.

¹² Ayom neya timu vu Kerisi, om getahu dok alam sën deneserög in bë degeko kupek-yagek-yi lo bepasang geserög niwëek in gemedo malam-tumsën degwata los degwata. In Anutu ggooin hong rak wirek lok buk sën genër rangah rak alam ngahisekë malaj bë rëk gesepa dok gagek anon lo.

¹³ Sa nanër vu hong jak Anutu sën nevo saheng vu ngaa malaj-tumsën pin lo, luho Kerisi Yesu sën

nër yi gagek anon rangah rak Pontius Pilatus mala gesu ggöneng in rë lo malaj nabë:

¹⁴ Gwegin gagek pin sënë nivesa. Su genanër la paya, gesu gwevong bemehö ngwë denanër gagek nipaya jak. Gaḵ ngo gwegin nivesa begëp niröp, rot behil Mehöböp Yesu Kerisi duk nom.

¹⁵ Yönon, Anutu ggooin yi buk rak ggovek ya bë rëḵ tato Kerisi rangah, lob yik Anutu timu sënë sën semusën degwa geyi ala menegin ngaa pin los dahis. Alam-los-bengöj pin hir mehö-los-bengö yi, gemehö böp pin hir Mehöböp.

¹⁶ Yik yi timu sënë sën su nediik rë. Yö nedo lok rangah sogek, om hil su ayoh vu bë ana dus jak yi rë. Mehöti su lë yi rë, gemehöti su yoh vu bë rëḵ gelë yi rë. Arë böpata rot geniweëk rot berëḵ medo degwata los degwata nabë saga. Yönon.

Gagek Rak Alam Sën Deneggorek Ngaa Ngahisekë Lo

¹⁷ Genanër vu alam sën deneggorek ngaa-dob-yi ngahisekë lo nabë su degeḵo sir jak vu alam vahi, gesu kwaj na vu hir ngaa sënë nabë doḵ vu sir, in rëḵ mala nama na pevis. Gaḵ mëm ayoj na timu rot vu Anutu, in yi saga yö nevong yi ngaa nivesa vesa ngahisekë vu hil in bë hil medo los kwad vesa.

¹⁸ Genanër vu alam sën deneggorek ngaa aga nabë degevong huk nivesa vesa ngahisekë, log degevong ngatum bedebo hir ngaa gelek alam bededok vu sir medegero.

¹⁹ Nabë degevong nabë saga, og rëḵ dengupin ngaa ngahisekë in doḵ vu sir vu tamusën, lob deyoh vu bë rëḵ denatök vu mala-tumsën sogek.

Gwegin Hong Huk Nivesa

²⁰ O Timoti, gwegin huk sên Anutu vo loḵ yök nemam aga nivesa. Gweruu demim vu gägek meris meris pin sên anon ma lo, los gägek jeggin jeggin sên su neya niröp vu Anutu yi gägek rë lo. Log gweruu demim vu gägek sên denenër medenekuung raḵ bē kwa böpata neggëp loḵ, rëḵ ma genesis begö vu Anutu yi gägek lo.

²¹ Alam vahi ahëj neving gägek nebë saga be-deneḵo raḵ, lob deneyoh paya in gägek anon. Anutu yi semusemu medo geving ham.

Gagek Mewis
The New Testament in the Central/Mapos dialect of the
Buang language of Papua New Guinea
Nupela Testamen long tokples Buang Mapos long
Niugini

Copyright © 2003 The Bible Society of Papua New Guinea

Language: Buang, Central/Mapos (Buang)

Dialect: Central/Mapos

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-02

PDF generated using Haiola and XeLaTeX on 18 Apr 2025 from source files dated 31 Aug 2023

18a972db-abcc-5dc3-9031-f1d4455b33c3